

Sucès pe 1^e edizion dal cors di furlan pai gjornaliscj

La ativitât formative e je stade organizade de ARLeF - Agenzie Regionâl pe Lenghe Furlane, in colaborazion cul Ordin dai gjornaliscj dal Friûl - Vignesie Julie

Al è rivât ae voltade di vele il cors di lenghe furlane par gjornaliscj immaneât de ARLeF - Agenzie Regionâl pe Lenghe Furlane, in colaborazion cul Ordin dai gjornaliscj e la rispueste e je stade otime: *«Al è stât il prin cors metût impins di pueste pe categorie dai gjornaliscj de region e o ai di dî che il riscuintri che o vin vût al è stât tant plui grant di chel che si spietavin – al à marcât Eros Csilino, president de ARLeF -. Lis adesions a son stadis altis e par nô cheste e je stade une sodisfazion grande. Za dal imprin, graciis a une colaborazion profitevole cul Ordin, o vin vût in prevision di meti adun gnûfs apontaments dedicâts ai professioniscj de comunicazion gjornalistiche e, viodint i numars regjistrâts, o proponarin dal sigûr altris ciclis formatifs».*

«O vin dât acet cuntune vore di plasê ae propueste de ARLeF di un cors su la lenghe furlane pensât di pueste pai gjornaliscj – al à sclarît Cristiano Degano, president dal OdGj dal Friûl - Vignesie Julie -. La tutele des lenghis di minorance e je di fat un teme impuartant te nestre region, là che une vore di testadis a publichin articui e servizis in lenghe furlane. E je benvignude, duncje, cheste colaborazion fra l'Ordin regionâl dai gjornaliscj e la ARLeF, e o sperin che e puedi lâ indenant midiant di cors, no dome su la lenghe ma ancje su la storie e la culture furlane, di zontâ tal nestri program di formazion».

La prime edizion dal cors si davuelç online. L'obietîf al è chel di furnî la formazion di fonde par imparâ a doprâ la grafie uficiâl, ancje in graciis dai struments informatics za a disposizion (tradutôr automatic, dizionaris online, coretôr ortografic, tastiere furlane). In totâl a son previodudis 25 oris, spartidis in 12 lezioni di 2 oris, plui une ore pal test finâl. Ae fin dal cors, dopo dal test finâl, la ARLeF e darà fûr un atestât di partecipazion.

Udin, ai 26 di Mai 2022

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<